

**Uunga siunnersuut: Akiliisarfik Ilangaassivik pillugu Inatsisartut inatsisaat nr. xx, xx. xx 2019-imeersoq.**

(Aningaasaqarnermut Nunanilu Avannarlerni suleqatigiinnermut Naalakkersuisoq)

**Saqqummiussissut**

(Aningaasaqarnermut Nunanilu Avannarlerni suleqatigiinnermut Naalakkersuisoq)

**Siullermeerinnineq**

Akiliisitsinermi atortorissaarut Ilangaassivik pillugu Inatsisartut inatsisissaattut siunnersuut matumuuna Naalakkersuisut sinnerlugit saqqummiuppara.

Akiitsunik kisitsisit paatsuugassaangillat, taakkulu akiligassat piffissaq eqqorlugu akilerneqartanninnerat nalinginnaasusooq takutitsipput. Inuit 30.000-it sinnerlugit pisortanut akiitsoqarput, akiitsullu katillugit 1 milliard koruunit ataatilaarlugit amerlassuseqarput.

Ajornartorsiut taanna inunnut ataasiakkaanut, taakku ilaqutaannut inuiaqatigiinnullu tamanut pitsaangitsorpassuarnik kinguneqartumut tigussaasunik aaqqiissusiornissaq inuiaqatigiinnut pingaaruteqartorujussuuvoq.

Siunnersuut 2019-imut Aningaasanut Inatsit, Inatsisartuni amerlanerussuteqarluartunik tunuliaqutaqartumut politikikkut isumaqatigiissummut malitseqartitsinerullunilu tulluarsagaavoq. Siunnersuut aamma Akiitsut Akiitsunillu akilersuineq pillugu Nassuiaat 2017-imeersumi, innuttaasunut akiliisinnaassuseqartunut, akiliinissamulli piumassuseqanngitsunut suliniuteqarnissanik pingaarnertut kaammattuutitut malitseqartitsineruvoq. Innuttaasut akiliisinnaassuseqanngitsut siunnersuummi immikkut eqqumaffigineqarput, taakkulu kingusinnerusukku tikissavakka.

Akiligassanik akiliisitsisarnerup nutarsarnissaanik pisariillisarnissaanillu siunnersuut siunertaqarpoq. Taamaallunilu siunnersuut akiitsunereerluni akiitsut amerlasoorsuannagortinnagit pinaveersimatitsinermik ingerlatsinerup pitsaaneruneranik iliuuseqarnikkut ajornartorsiutip qitianut iliuuseqarneruvoq. Taamaallunilu akiliisitsiniarnermi periuseq matumani pineqanngilaq.

Pisortat oqartussaasut, sulisitsisut tunitsiviillu innuttaasut isertitaannik Ilangaassivik aqputigalugu akiliisarnissaannik siunnersuut aqputigalugu peqquneqarput.

Tulliullugulu siunnersuutip, innuttaasunik, pisortanut ulloq akiliiffissaq qaangerlugu akiligassaqartunik akiligassanik akiliisitsisarfirmut Ilangaasivimmuut ilaalernissamut

peqquneqarsinnaanerannik, imaqassaaq. Tamatuma saniatigut innuttaasut akiitsoqanngitsut nammineq piumassutsiminnik Ilangaassivimmu ilaalernissamut nalunaarsinnaapput. Taamak pisoqarsimatillugu akiligassat ataavartumik inuit ataasiakkaat isertitaannit akilerneqartassapput, pineqartumut tunniutinnginnerini.

Taamaalillutik innuttaasut aningaasanik allanut atuisinnaanerat sioqqullugu pisortanut akiligassat akilereerneqartassapput. Taamaalillunilu innuttaasut Ilangaassivikkoortumik aningaasanik pissarsisartut pisariaqartitanut pisiortornerminni pisortat karsiinik akiitsorniartarfittut atuinissamut periarfissaarutissapput. Taamaalilluni pisortanut akiligassanut ingerlaavartunut akilersuinerit, aningaasanik atuiffissanit allanit, soorlu nammineq atuinnermut imaluunniit privatimik akiligassaqaqfinnut akiligassaninngarnit, salliutinneqassapput.

Innuttaasut akiligassanik akileraavimmu ilaatinneqartut inuussutissaminnik aningaasaateqarnissaat, pisariaqartitanillu pisisinnaanissaat qulakkeerniarlugu, innuttaasut qaammammut aningaasarsiaminit minnerpaamik aningaasassaqaqarnissaanik piumasaqaammik siunnersuut imaqarpoq. Kisermaamut aningasat atugassat 4.000 kr.-nut aalajangersarneqarput, aappariinnullu 6.000 kr.-nut aalajangersarneqarlutik. Taakku saniatigut meeqqamut ataatsimut 18-it inorlugit ukiulimmu angerlarsimaffimmi najugaqartumut tapi 1.600 kr.-nik aamma ilaatinneqarpoq.

Maleruagassat Naalackersuisunit aalajangersarneqartut naapertorlugit kommunalbestyrelsi aningaasanik atugassanik annertunerulersitsinissamik aalajangersinnaavoq. Soorlu uani assersuutigalugu pisariaqarsinnaasoq inunnut innarluuteqartunut inunnulluunniit namminersortut attartortitaanni, Ilangaassivik avaqqullugu akilersorneqartuni. Naalackersuisut aningaasat atugassat annertussusaannik nalunaarutikkut aalajangersaallutik suliaqarnerminni kommuninik susassaqaqartunillu allanik suleqateqassapput.

Innuttaasoq Sullissivik.gl-imi quppernermut iserluni akiligassat suut atortorissaarut atorlugu akilersinneqarnissaanik takunnissinnaajumaarnera eqqarsaataavoq, soorluttaaq innuttaasoq qaammatikkaartumik akilersukkanut takussutissamik nassinneqartarumaartoq. Taamaalillunilu innuttaasoq akiligassaminut malinnaatinneqassaaq.

Akiligassami kukkuluttortoqartoq innuttaasoq isumaqaruni, pineqartoq akiligassiisumut saaffiginnissinnaavoq. Siunnersuutikkut akiligassiisut, soorlu INI A/S, akiligassanut akerliliissutinik taamaattunik, Ilangaassivikkut akilersortinneqartunut naammagittaalliutinik suliarinninnissamik pisissaaffilerneqarput. Tamatuma sanitigut akiligassanut Ilangaassivik aqputigalugu akilersortinneqartunut akiliiffissamut piffissaliussat sivitsorneqarnissaat siunnersuutigineqarpoq. Siunnersuulli aqputigalugu innuttaasup akiligassiisullu akornanni inatsiseqarnikkut pissutsit innarlerneqanngillat.

Siunnersuutikkut paasissutissanik isumannaatsuutitsinissamut, kiisalu innuttaasut isertitaat akilersugaallu pillugit paasissutissat isertuunneqarnissaannik qulakkeerinnittunik sinaakkutinik erseqqinnerusumik maleruagassiornissamut Naalackersuisut piginnaatinneqarput. Taakkulu saniatigut Ilangaassivimmik atulersitsinermi pissutsit assigiinngitsut allat pillugit maleruagassanik aalajangersaasoqarsinnaavoq, tassani sulisitsisut

atortorissaarutikkut akiliineranni, akiligassanilu akiligassanngortitsinermi periutsit suut, teknikikkut piumasaqaatit atuutissanersut ilanngullugit.

Innuttaasut amerlanerit piffissaq eqqorlugu akiligassanik akiliisalernerannut siunnersuut kinguneqarumaartoq ilimagineqarpoq. Tamanna nukingisaarinermik akiliisitsinernut akiitsullu amerliartornerannik pinaveersimatitsinikkut ataasiakkaanut siunnersuut iluaqutaassasoq ilimagineqarpoq. Taamaalilluni innuttaasut amerlavallaanik nammassinnaanngisaminnilu akiitsunitarnerat pinaveersimatinneqassaaq. Akiitsut annaasalu annikillinerisigut, akiligassat pisariinnerusumik akilersortinnerinut akiliisitsiniarnermilu isumalluutit atukkat annikinnerulersinneqarnerisigut Ilanngaassivik pisortanut iluaqutaassasoq ilimagineqarpoq.

Taama oqaaseqarlunga siunnersuut Inatsisartunut oqaluuserisassanngortippara.